



Мэбета вадава” ила’ панан’ етри’ мэква”!  
**НЯРЪЯНА**  
**НЭРМ**

ГАЗЕТА 1931 ПО’  
 АПРЕЛЬ ИРЫГ ЮКАД ВАТА  
 ХАСАВАЮДИМДЕЙ  
 ЯЛЯХАД НЯДИБЕРҢА

СИ” ИВ ЯЛЯХАНА  
 НОПОЙ” СЕРТАБИВА”



№ 6 (5228)  
 2025 по’  
 февраль иры’  
 8 яля  
**СУББОТА**

Российская Федерация Ямало-Ненецкий автономный округ



Сидяңг”: А.Яптик тадтавы”

Сехэрэмдо’ харто’  
 ерыбидо’

3



Сидяңг”: М.Яр тадтавы”

## Тоса нэдалёрта”

Яра иры’ сидя юдимдей ялэ” пиркана Надым’ няю’ нэдалаңгува”. Смянхат тарана” ненадо” ялэ мэтава” – ты пэртина” сянакова’ яля” нэңгу”. Тодо” яхат мядонда” тута”. Маня” нани’ тания’ нэдалёртава”.

Хэвы си”ив яляхана Нядаңгарад’ няд мэкад юнм’ намдаваць. Пирдырманзь тованда” ненэй ненэця” вадам’ мэ”мыщ. Ма”нисям”: «Ты пэрти” сянакова” мальңгана квадрокоптер мэта” яңгобто’ тара”. Тикы” мутрыд туюд нэдалёди тадтамбасеты”. Мунодо’ я”ав-

ласеты”. Сэбинена” мун” нэдалёда” ты напрамби”. Тарцяхат ненэця” тыдо’ тодо” я”амна ханаць пирңа”. Ханяңы” нэдалёрць мэта” тыдо’ саць хэхэда”, нядьбята ехэрана” мун” ханм’ мэтахана саць вэва”».

Небо’ ты пэрти” сянакова’ яляхана квадрокоптер” мале сян нэдалёдам’ напратыць. Нопой ханм’ мэ”мы ненэць’ сехэрэнда хэвнямна хэвысь, тамна’ тяха’ пирдырць нивэда пирас”. Нани’ нобто’ хацявысь хадюла”.

Тикы’ хавна нани’ нопой маяндо’ нэдимы – ервссяда” вэнеко”. Нядандо’ хунтана ханм’ тэри сянакоңэ тасламбидо’,

ханяцей’ нэраку”лабидо’. Тэвбато’ нэдаць пир”надо’. Е”эмнандо’ ненэця” хусувэй по’ маяндорңа”. Квадрокоптерм’ мэтахавм’ тамна хэвня’ тидхалеңгудо’. Ервссяда” вэно ханзеркарт” пиде я”мыдо’.

Тарця вада” нэка хибян’ сававна ха”амвыдаць. Тедари’ хардандо’ ерв, сянакова’ ялям’ минреванда” тикы’ нямна вадам’ нивыць мэс”. Тарем’ нод” нэка хибя” нэхакуд хамеку”. Пирдырмидо’ яра иры’ 22-23 яляха”на нэңгу”.

Марина Яр’  
 падвы

## Е”эмняна”

Округна” нэвахана мэна няби я’ индадм’ нэкалпади” компания’ ерв яңга нэбнзер” серо минрева’ няю’ нэда ненадо падарм’ падвэхэ’. Тикы’ пидтевы падарти’ сер’ Дмитрий Артюхов няби Леонид Михельсон тад тованда тет похона ненэцие” ед’ нэдиберта проектади’ нэбкана тасламбаңгуди’.

Пидтевы падар” тарця ныхыса-вэй: яна” тер” е”эмня лекар” мядо, школа, нюдяко” нэцеки” мэлава мимбава, ненэцие’ лекарабтамба нэдаңгова, ненэцие” илам’ савум-дамбава, нэрм’ тер” ила’ саирм’ лэтрамбава.

Тюку по’ Тарко-Салехана Юбилейнойхана нюдяко’ нэцеки” мэлавам’, 240 нэцекең таславы харадм’ мимба пэңгу”. Новой Уренгойхана нэрка ненэцие” лекар” мят’ едэй лекарабтаңго мэта нэво тэмдаңгу”. Ямальской няби Тазовской районхана илени нэдаңгу”. Я’ мал’ вымна мюсертаха” спутниковой телефон, снегоход, генератор, топливо, пэхэрэй мита”. Тасу’ я’ тер” е”эмня нэбтики’ снегоход хамэдаңгу”. Тамна нани’ нэд”мыдо’ – пям’ тэволава, фактория’ хардо маньева, сулорпава, и”мня мэта нэво тэмдабава. Ерво” вадавна нэдаңгосэй” ты пэрти”, халям’ хадабади” илам’ савумдаңгу”.

Нэбкана минрена проектади’ нэка. Нэрка предприягидо’ Тарко-Салехана нэ, нэдьбята танияңы яхана саць нэдаңгу”.

Анна Яптик’ падвы

## Иримдо’ нидо’ юрыбю”

Округна” нэвахана мэна Нэрка сайнорма’ сиднет ю” поданда хэва’ ед’ тоенана по” ёльцяңгана таром’ тэвравы ненэцянд’ ненадумда”мам’ миңась. Тарця медаль яна” нэрка ерв Владимир Путин’ ватовна мипа пэйдонзь. Ненадо падарм’ хэвы по’ вэба’ иры’ нябимдей яляхана нэдимдедась.

Николай Шакуров 1947 похона Ямалан’ илеванзь товы. Юкад вата сидя по” ямбан’ Салыңгардахана палытанаңэ таравы. Пенсиян’ хэванда сер’ нани’ манзара”ма хардаханда тэвавы”: сянэрмам’, ламбитавам’, тудакумам’ харвабтавы. Таддикахад хусувэхэт илебей ненэцие лаханако’ ня”мы, нянандо’ сайнормахана мэ”манда нямна лаханавы.

Сайнорць пэванда мальңгана юкад вата си”ив порида нэвы. 1943 похона тохолковам’

мэ”мы. Пуна нэхаромдэй Белорусской фронт’ 315 Смоленской дивизия’ рядовой-бронбойщикнэ таралмы”. Нюртей ханабавы хардада Орша нэвы. «Багратион» нэбета серкана мэвы, Белоруссиям’ няби Прибалтика’ няна нэда ё нэдабавы. Каунас харад’ няна пилу” ирыхына 1944 похона ядаравы”, тикэнда пуд сита ва”лавы”.

Тэда’ Николай Тимофеевич Салыңгардахана иле, пыда 98 пода. Дмитрий Артюхов мяканда ненадумда”мамда тэвраванда мальңгана тарця вэди хэтась: «Нэрка сайнорма’ пирдалевандо’ е”эмня яна” тер” мал’ варемдо’ мэ”наць. Иринана” таром’ пилибт” тенебнана” серо”на. Ветеранха” савари вэди мэ”надм’, неновна сенз’ нэя”, паңгодо’ нэдана” таромдо’ тенемдо’, харто’ ямдо’ сидто’ пирувна мэнемдо’».

Ямалхана Нэрка сайнормахана мэвы хаёвы



Сидяңг”: t.me/artuyukhov\_da нэд ханава

тетри, Ленинградм’ нэдабавы – хасава ю”, лэгерьхана сярвы - сидя ю” тет, манзаяха”нато’ нэдаңговы” – мат” ю” сидя ненэця”. Едэй ненадумда”мам’ тарця серка”на таравы” ня”марпаңгудо’.

Нэнинэ Яптикы’  
 падвы



# Мараңгам' нубе'ңа



Сидяңг: К. Яндой тавы

**Округханана» «Морошка» нубета картам' сертаць. Тарцяңм' пенсия-хана мэна» ңарка ненэця», ңацекеы» ня»марпаңгу», нянандо' няд»маңэ тараңгу.**

Тикы проект Ямална» ңэвахана мэна ервана» вато' сер' таславы. Тэмдорць мэта «Мир» нубета ңарка яна» тиңгэвана ңэда системам' няд»мяць сертавэдо'. Округханана» илена» ненэця» нюхуто' тарця картам' нэсь пирңа», ңамгэрим' тэмдаба еся ңэсяңэ таславы ни ңа». Тикы хавна ханяңы» «стикер»м' мэта». ңацекеы нензел»мана мэць пир»мамдо' харто' таслаңгудо'. Тохолкода»

урокато' хавна ңани ханяри' ханцеты», та-ель- цяңгана «Морошка»м' интернет' мутра' сер' мэтадо'.

Тедахав тет яңота неракоход сертавы ңамгэрим' нянандо' минартадо'. Тахабтавы, ё»мы ңэбто', ңанисэйвана серта, тэмда тараңгу.

Ѓокханда юкад вата си»ив ёнар» картам' ңадимдевы». Тарцяңм' ня»маванзь яра иры' нюртей яляхана МФЦэн' хэсь тараңгу. ңани' лаха самляңг юрм' выңгана илени» тохолкода» ню»еэмня сертавыць.

## Лыта сер' сулортадо'

**То' лаңгахана самляңг по' тяхана Константин Тадибе Сёяха' выңгана я' хора' хани' лэдым' едтевы. Тамалыңгы ховэмдо' сулорманзь Ленинградской областян' ңэдаравэдо'.**

Пыда малкованда сер' Печевалава то' лаңг табо» поңгад тюхулмэда. Хо»махаданда таминда мутра' сер' хардан' ваде»мэда. Сёяха' ңэвахана мэна ервадо' тарця ңавэ теневана», тохоламбада» луци хонравы. Гад пуна' вынд' Саляңгарад' ңарка музейхана манзарана», Арктикам' тохоламбади», я' нийм' хабтомдамбади», сармик лэтрамбади» научной центр' тер» товы».

Тарем' тасла»махадандо' юкад вата потна илебей сармик ңэвы. Тет ю» тет ёнар» по' тя-

хана илевы. Я' хора' лэды наңэдыркаңэ ян' сояравы. Няби пуңэнда лы» яңговы». Сававна ңо»ма' ямда манэсо»махадандо' Саляңгардан' тэвравэдо'. Маркана Константин' ед' «Тадибя»ңэ нюмдевэдо'. ңарка музейн' мэвэдо'. Тикахана ңэдаханда выставкавна ңадимдембавэдо'.

Тенкана лыта вомаңгад Ленинградской областьхана ңэда Рождествено хардан' сулорманзь ханавэдо'. Таняна ңопой по' ямбан' сертабаңгудо'. Тикы' пуд наңэдя я' хорадарев' ңахат мэлваханда Саляңгарад' музейн' тэвраңгудо'. Тикахана ңо»махананда хэвдалё ңэңгу.

Тадри' ңани яляхана музейн' тэвортава». Тарця ңавэ сертаба ва»лэй ненэцие» тарамам' манэ»тава».

## Тюнтаңговам' мэ»мы»

**Тюку илаңгана илебей ненэй ненэця» тюнтаңговамдо' ханярина мэць пирңадо'. Ямальской район-хана ненэй мяд' мюня тюнтаңго пывэдо'. Тикы' няю' Яр-Саляхад ЗАГС манзарана» Сёяха' няю' нюртей тарем' ңэдалёрмы».**

Кирилл Яптик няби Воттане Вануйти ниди' ңацекеы ңэванди' мальңгэхэд теневыди'. Мядодо' ңоб» хэваркахана ңэвыць. Выңгана та' ңобт' ңэсормы». Самляңг по' тяхана Воттане Саляңгардахана тохолковы. Та' мальңгана ниди' хамзахалмэхэ». Небо' сие ниць ирыхына интернет' мутрам' няд»мяць «Госуслуги» сер'

нерняңы иламди' ңобкана минреванзь падарм' ңэдаравэхэ'. Тенкана харти' мяд' терңэ хэвэхэ'.

Тюнтаңговамди' мякаданди' ха-хаярка ңэда яхана, Сёяха хардахана мэ»мэди'. «ЛЭЁ» нубета организация' тер» сидти' сававна нядавы». Тарем' ненэй мякана ңобт' падна»ма' падарти' ня»амвэхэ'. Теневана», харе» ниди' мядо»манзь товы». Нядандо' ңока лимбика вадам' намдавэхэ'.

Ненэй няхаюна» ңобанзер» хынёси» илеяха'. Ниди' хусувэй серкана нядабаяха'. ңэрм' тер» ненэцие» ила' саирм' нерня' нюхути', нюти' ню» ңэсонд' нэдамди'.



Сидяңг: t.me/zagsyanao89 няд ханавы

## Есям' ня»марпаңгу»

**Манзаям' тохоламбада» илебей ненэця» есь ня»марпаңгу». Тикы округна» ңэвахана мэна ерв ңадимдевы вато. По' пеля' ямбан' ирыхына ю» ёнар» есям' мипаңгу».**

Тарця есям' ня»марпаван' харвана» падродо' яра иры' пудана яля' ңэсонд' ңэдара пиртыдо'. Ямалханана» школам' сававна малевы», ява» лэтрамбади» ню», Волновахад товы» ңацекеы» есядамдо' ня»марпаңгу». ңарка маркана яля' тохолкода» ңэрм' тер» илебей» ненэця», таддикахад ня-харомдэй курсахана – илаңгана саць тарана манзаям' тохоламбада» ңани' таня' падродо' мипаңгудо'. Коллед-жхана тохолко варемдо' мэти ңани' тэрабаңгу». Ты» саполана иры' сидя ю» самлянзимдей яля' ңэсонгана есям' ня»марпаванди таслаңгудо'. Округна» ңэвахана мэна ервана» табеко' сер' «Мир» нубета тэмдорць мэта карточкыто' падро мипато' тараңгу.

Ѓоб» пэдава ненэй нем' – ңанине Сэройм' хонрамбидамзь. Пыда Саляңгарад' тохолкулвахана лекар' манзаям' тохоламби. Тарем' лахана-нась:

– Мань ихинани округханана» еся нядаңгосэй сертабавадо' сава. Ханярина тохолкода» варемдо' мэта», сяманхат ва»лэйдо' няд»мам' ня»марпаңгу». Мань пудана курсахана тохолкудм', тикы' сер' падрони миць я»маңгун'. Тандая' тохолко пэвы» няхани манзетыдм': «Тохолкованда» хавна ңани' ханярина таром' ха»молада»».

ңавнанда тарця нядаңгосэйм' Ямална» ерв' самляңг по' тяхана таславэдо'. Таңок по' ямбан' ңокханда хасава юр» самляңг ю» тохолкода илебей ненэць' есям' ня»марпавы». Тарем' таслаб», мале ңока манзаям' тохоламбадам' нядавы». Тандая' ңарка иланд' ха»мотанаха»на еся нядаңгосэй ңули» тара.



## Ѓудида мэбе"җа"

Хахаяда яля' Салехардахана тодо" яхана манзарана" организация" тер" җобт' ма"льць. Пыдо' помнандо' волейболхана сянакуць.

Нито' нерня колледжхана тохолкода" няби комбинатхана манзарана" пирдырҗаць. Поҗганандо' мале сян ненэй ненэҗам' манэ"җадамзь, тикахад нубедо' хэтыбабто' Сэротэтто, Окотэтто, Айваседо, Хороля еркаро намдадамзь.

Тю"уй этажахад сырҗаваць. Пирдырти" поҗгана саць ва"лэйвана сянакодам' едтедамзь. Пыда җобкарт' мячм' тэри тарем'ян' нись җэдара". Тад санабата җудида поҗга' тю"у' таҗга тэворҗаць. Мячмда минаць ладьбидась, моёпидась, лат' ед' хуб"насавай хаморҗась, няби"нида ладьба нидонзь тэвор", җудахатато' нялкадарҗась.

Ныланавато' ёльцькохо"на някунда хаядамзь, няданда хонаркудамзь. Ѓытарми" Саля' тер Константин Хороля тарем' лаханась:

–Нябимдей по' колледжхана и"мня җэдалёрта җарка җаном' мэтанэ тохолкурҗадм'. Школахана сиднетимдей классахана мэвани мальҗгана волейболм' саванэ манэ"җавась. Район' тиҗгывна җэда" пирдырмаха" си"ми җобҗгэв' ханабасеты". Тюкон' тэв"махадани мэнена серми тамна' тыха' минре таславась. Теда' Саляҗгардахана җэда" пирдырмаха"на етри' мэсетыдм'.

Лахарёми' хэбицякось. Намдаван' харванахавами җули" җокась, нями паромась. Мань җод" пуна хаядамзь, сянаковамдо' җарханда нивась манэс". Команданда нябимдей ян' ха"амвам' интернет' мутравна намдавась.

Ти, тарця мэбета", варемдо' мэта" сёбарна" теневабна" тара"!

Анна Яптик' падвы



Сидяҗг: А. Яптик' тадгавы



Сидяҗг: Р. Окоҗтто' тадгавы

## Сехэрэмдо' харто' ерыбидо'

Салехардахана илена" илебей" ненэҗа"  
«Наследие» толаҗгулава' хардахана ма"люрҗаць.  
Тюку похона нюртей мэва җобт'  
тэвавадонзь. Лахарёдо' җули" җуя миҗась,  
няхато' едэйвана пявы, тад нерня' пыванда серодо'  
ваде"җаць.

поҗгана сё мэтанэ тохолковэхэв яҗгу. Хадами няби нисяни не ня хыноцетыхы'. Неями Зоя Воттаковна Ѓокэй сяхаҗгав' Сёётэй Ямал ансамбльн' ядэрмысь. Теда' няданди', җармы ненэҗаҗгат ма"ламбада" хынабцани, ярабцани, сюдбабцани ёховоҗгадандо' яҗга падарт' падыбасетын. Стихотворения' вадахав лакри' тось пир"җада, җадьбьята телефонми җоб" хамэдёсеты. Нямэхэна мякани хан"җадамзь, мале сян сём' пададамзь. Мяк" туртаха" манзетыдм': «Ярабцадва" мэ"җада"». Пыдо' пуна' нисеты"җа", намдавыдо' вадецетыдо'. Небяхаюни'-нисяхаюни' җани' манзетыхы': «Хобцоко", лаханако", ярабц" тенева тара", тарем' невхы илма" ни ёход"».

Мария хыноць мале"мя' пуд хибяхав мамондась: «җавна ненэҗа" иле"мидо' падарт' нивыдо' падыбю", җэвто' мюрина лэтрамбававыдо', теневавыдо'. Теда' сабе сидто' тотрев' пирта яҗгу. Хынопато' ялэхэ" маниена" манзаидо', серодо' ваде"мы"».

Илебей ненэцие" тарем' ма"люрма сава, пыдо' яля' ня' җэда и' ядэрабцодамдо' хомби".

Анна Яптик' падвы

«Ругинский клуб» ма"лёван' хуркари тэнз манзаи минрена", тохолкода" товы". Пыдо' мал' варемдо' мэта", тодо" яхат, нюдяко" хардахат җэда" җэрм' тер". Хусувэйдо' җамгэхэв ихинанда пойда серцавэй. Поҗганандо' паднавам', падтаҗговам', тадтаҗговам' мэнена" таян".

Ңопой мядонда Сёяха' терась. Няхаромдэй по колледжхана сё мэтанэ тоходанана Мария Окоҗтто едэй няндерм' тэвра, хаданда сём' мэ"җа. Хыно"манда пуд сита лаханако ня"җадамзь. Тикахад хибяри тикы илебей ненэҗаҗгат хонаркоб"нани няни манзеты": «Луца вадавна лаханабни сава җэҗгу?» Теда' лаханако ня"мы няни нюртей вадада тарцясь: «Ненэй вадаривна пыхыдани нямна лахана пиртадм'».

–Нара' сыра' ханона" хае"махадана" җэрм' няю' мюселцетына". Маня" мюсьлавава" Надо-Яха' малхад Харасавэй яха' няю' җэсеты. Таняна, выҗгана вады-

дамзь. Хар"н мэвани сер' ихини җамгэхэв" вада" тосеты", пуна җобт' таслахая хайнана вадаҗэ хэсеты". Ненэй вадавна паднавам' мэнев, ини ядэрабцо толабада" ненэҗа" падвыни сававна хамэдамбасетыдо', –Мария тарем' мась.

Школахана тохолкованда мальҗгана Ты пэрти" сянакова' яляха"на хыноцетывы. Тамальҗгэхэд Татьяна Нюдихасововна Лар' сё мэць пявы. Пуна «Сольное и хоровое народное пение» тохолкован' сита ня"амвы":

–Мяни тер"



Сидяҗг: А. Яптик' тадгавы



# Ненэй вадава" падвэвната тохоламбива"



**Яра иры' сиддетимдей яля – нули" ненадо. Нарка яна" тигрэвна Российской наука' яляңэ таславы. Ѓадьбяна" газетаханана" нопой юнета нява" тензобтеңгува". Тикы – Елена Григорьевна Сусой. Пыда иланд' ямбан' минревы манзаяхананда ненэй вадана" няю' сертавада нока. Ѓавна «Няръяна Ѓэर्म»' е"эмня иламда ваде"нась. Нянанда паднана нява" лаханакурнась. Мэ"мы" вадид'аңи' намдахана".**



Ямальской районхы Пэ саля' выңгана соявэдамзъ. Ѓамгэ по, яля нэвакы. Невхы похона нисанана", небянана" луца вадам', падарм' ехэраць. Ѓадьбятта ваде"мэвнандо' хар"на" тасламбасетына". Ихинани 1932 по нэвы нэңгу. Небями ма"нисяв, нарка пэвдей иры' пиркана соявэдамзъ.

1941 похона вэба' ирыхына Ю" яха' мюмня нанокоця нэдимясь. Тамальңгана нердена яңорэй луци" манэ"надамзъ. Новой Портхад нес ненэцяңг' Ковалёв еркарм' мэтаха' товэ хэнзъ. Дарья Алексеевна интернатхана манзарась. Вэсакода Алексей Кузьмич - ты" лекарась. Пыди' школан' си"ми хосаяңаханзъ. Новой Порт' интернатхана нули" сава" луца", луце не" манзараць. Ѓани" тэнз" нэбото' нод" нянана" ненэй вадаривна лаханакурцеты". Маня" неяңэ, хадаңэ, тидяңэ, ириңэ ваде"цетына". Тохолковами сайнорма" пон' еремясь. Тюку иланд' тасла, саць маяндормэва". Нянана" манзаравы" сидна" луца падарт', иланд', манзаям' ниня пилютаңэ тохолаць.

Мат" по' тохолко"махадани', Салехардан' пывась. Таняна педагогической училищехана

1949 поход 1954 по' ельцянд' тохолкудамзъ. Хуркари сава нядми торомдадамзъ. Помнана" сензңэ илесетыва". Тамна окружком комсомол' ватовна манзай пэрцетыдм'. Ненэй ненэцие" падарт' тохоламбасетыдм'. Хуркари концерт сертабасетыва". Пьеса манэ"лабтамбасетыва". Нерденава" – И.Ф. Ного' падвы, «Шаман» нубетась. Тикыни" хавна училищехана воспитатель' няд"маңэ манзарадамзъ. Ирыхына си"ив есям' ня"марпасетыдм'. Таңы ныланавахани' ёрти" таңоцяңг" хэсетыдм'. Партия' серо вадецетыдм'. Ханяңэхэна поңганандо' ёрцетыдм'.

1953 похона Салехардахана нули" сава ненэциам', нердена ученойна" Антон Петрович Пырерка' пухуцям' торомдадамзъ. Вэсакода сайнорма' мальңгана яңгумась. Тикы – Терещенко Наталья Митрофановна. Ненэй вада' нямна пили" сава нядни хаясь. Ѓобкана ненэй вада' теориям' пянинзъ. Пуна словарьм', ненэй ненэцие" лаханако, 4 классахана мэна нэцеке" ед' толанго книги нобкана нэдимдейнинзъ.

Салехардыхы училищени мале"мяхадани' Ленинград март' Герценм' нюмам'

мэта институтан' тохолкованзъ си"ми нэдараць. Наталья Митрофановна' ня таңга нобкана словарь' нямна, лаханако" книгавна манзарасетыни'. Таняна вадава" тохоламбада" луца' няха"ни сыраць, тарем' таславась: «Илаңганани етри' вареме мэпни, ненэй ненэциени" ед' нарка таром' ха"авраңгудм'». Илни' ямбан' тикы ватоми нэдадм'.

Ленинградхад тохолко мале"мяхадани' си"ми пырдари' Салехардан' нэдараць. Педучилищехана ненэй вадан' илаңгы ненэцие тохоламбидамзъ. Ѓоб" по манзарадамзъ. Тикы' пуд «Няръяна Ѓэर्म» газетан' си"ми нэкалңаць. Ѓадиберта газетана" лабцхана редакторнэ тародамзъ. Тикы' пуд Пуровской районхы КПСС комитетхана инструкторнэ таралъяваць. 1961 похона аспирантуран' тохолко хаядамзъ. Научной манзаями Наталья Терещенко тидхалембись. Диссертациями «Методика обучения чтению на ненецком языке в начальных классах» нубе"нась.

Хар"ни ученойңэ хэ"мяхадани' Салехардахана санаторно-лесной

школахана манзаралъяваць. Пуна нобтики невхы яхани' училищан' тэываць. 1972 по' ельцянд' манзарадамзъ. Тамальңгана училищехана тохолкурта" мал' вадам' тохоламбидонзъ. Хуркари" илебей" пирибтя" ненэй вадавна лаханасеты". Ѓобкартадо' пуны' ни нэсету". Нюдяко хардахана манзаравандо' мальңгана ненэй нэцеке харе" вадавнандо' лаханакурць няцетыдо'. Училищехана Елена Михайловна Талеева' ня едэй учебник сертаба пянинзъ. Георгий Николаевич Прокофьев', Анатолий Иванович Рожин', Наталья Митрофановна Терещенко', Антон Петрович Пырерко' сертавы" няд"мяць паднанинзъ. Мани' 1-2 классахана тохолкурти" ед' учебникм' нэдимденинзъ. Наталья Митрофановна' ня 3 классха"на тохолкурта" нэцеке" учебникм' паданинзъ. Пуна нэцеке тохоламбади" ед' методической пособий падыба пядамзъ. Ѓамгэ' пиркана 5-9 классахана тохолкурта" ед' литература книгама' ма"ладамзъ. Нердена литературана" учебникм' «Няръяна Ѓэर्म» газета' редакторня Хабэча Хываревич Яунгад', Нейко Максимовна Янгасова' ня сертаваць. 6-7, 8-9 классахана мэта" литература учебник хар"ни падыбинась.

Ила' сехэрэвна ядаб", хуркари' парондэй, ваңг, ляхаце хомбин. Тикавна ядбат, монэрць нитара". Тарем' тидпой" яднари" иландо' сава нэвам' хамедаңгудо'. Мань ханзер" илевами, пудни хаёда" ненэй нини" таслаңгудо'. Сяхари' нопой хибяри мамбата: «Ненэй вадами Елена Сусой' падвэвна тохоламбивась». Тикахана хумбанзи" я' сяр' ниня нивэдм' ядэр".

Галина Ѓокэй' падвы

Илаңгы ненэцяңг" манзетыдм'. «Нэда" лэкада". Пили" нерия' пэрңара". Тэри нэда" нандо". Маня" тохолкована" мальңгана хуркари" себар" секцияха" ядэрцетыва". Ламбахана, конькахана едэйкосетыва". Самбохана тароцетыва". Санарцетыва". Ныланава' яляхана театравна ядэрцетыва". Тамна самбляңгрин', тетрин' тохолкурпата" тара».

Сидяңг": Е. Сусой' архивхад ханавы"





# Паңгодо' ты пэртыхат миңа"



Сидянт: Ю. Талеева, җадыбтавы"


Пона" нердена" яля" пиркана Няръяна маркы ерво" мякана җока хибяри" ма"лурҗаць. Поңганандо' сайнормы", пон' җопой яхана таром' ха"аврамбавы" ненэциена", Совет" манзай тасламбада", конкурсаха"на нерня" тарпвы" нина" мэвы". Пыдо' җока по" харе" манзаяханато' җарка таром' пэмбавы". Хуркари" ненадумда"ми недво"мы". Тарця хибярина" таяван' маймбива"!

Округханана" ты пэрма – сямяхат тарана. Яханана" сани" юр" по" ямбан' тэхэ"на мюсерта" хусувэй хойхана тая". Тарця" хибяри" лохо' мюня җани' мэць. Сядейской"-Ледков" – Красноярхад, Рочев" – Хонгурейхад, Ледков" – Индигахад, Ледков"-Лаптандер" – Каменкахад. Вы' тарха"на ты пэрма, мяд' хасёда" – хусувэй яля' манзаядо'.

Тэхэ"на мэнаҗэ яңга ханя-хартахана нидо' тохоламбю". Небянадо', нисянадо' мание нюдя җадахандо' тоходана". Ты пэрма' серм' минрена" мяд' тер" тянё ни" җа", тенад' мюсерҗа". Вадами Ледков" - Лаптандер" нямна җэңгу. Җокхандо' сидя юр" по" ямбан' ты пэрҗа".

Җарка сайнорма' това нерҗюй похот мале мюсермы", паңгодо'

Елена Ивановна Ледковхад миңа". 1898 похона Нюдя я' хойхана мюсерта ненэця' мякана соявы. Тюку яля' Ледков' паңгхат перена Зоя Егоровна Лаптандер Каменкахана иле. Нися' хасада - Егор Алексеевич Ледков, серм' сававна тенева"на ты пэртя җэвысь, пудана Җарка сайнормахана мэвысь. Сайнорманзь 1941 по' җарка пэвдей' ирийхана «Няръяна ты» колхозхад оленно-транспортной эшелонхана җадалавыць. Фронтхана ядаравыць, госпиталькана мэвысь. 1946 похона пуны' яханда тэвыць. Җамгэ' пиркана Егор нелеяць, пухуҗада Тиманской хой' терась. Зоя' нися, небя тыди' пэрҗаханзь, яб- да илеҗаханзь. Сян по" ваерась, нюдяко хасава



нюкцянди' ил' ныклёвысь. Вэвако сер" җобнзер' ядэрҗа", сидя по хэ"мяхад нисядо' яңгумы. Тет җацекы" евакоҗэ хаёвы". Зоя 12 потась. Серт' еремзь, җацекы вадабадаҗэ нисяндо' небя Елена Ивановна Ледкова таралҗаць. Җаркамбой не җацекы хаданда сава няданҗодаҗэ хэвысь. Нюдяко не нямда – Еленам', хасава нида – Иванамда, Протасиямда, Григориямда хуркари" серкат лэтамбись.

1965 похона пыда (Зоя) Леонид Лаптандерхана хаюпа хаясь, вэсакода җобтики тэхэ"на мэсь.

Едэй мякананда вэсакода небя – Марфа сававна ядабтадась. Хусувэй серкана меймда нядаба-сетыда, сэдорась хаданда хэвхана тоходанась. Вэсакода, Леонид Васильевич илеванда ямбан' тэхэ"на манзарась. «Няръяна ты» колхозхана сменной выпас мэць пяб"нандо', мята тер" – пухуҗада, нюда хардан' илельҗа-даць. Каменка җэсын' тэвыдаць. Хасава" манзарасеты", тыдо' маниесеты", лакамбой' ныланаванзь хардахато' тэворцеты". Зоя Егоровна мяд' пэртяҗэ, сэдоранаҗэ сэдорани" хардахана тарась. Лаптандер' мяд' тарха' выҗгы иланд' мэввна сыртаханзь. Сававна манзараванди' ед' хуркари ненадумда"ми ня"марпасетыхы, ихина сомбой вади намдорцетыхы'.

Теда' Ледков"-Лаптандер" тамна нерня" миңа". Тэнзхатато' перена" ненэця" округна" ты пэрма' серт' җока ныхым' масибтевы". Мал" иринато', нисянато' минревы серм' тенева"на, иланд' ивьер' сырта". Пыдо' - ты пэрма' серм' нерня" минрена", сававна тенева"на".

**Юлия Талеева'**  
падвы

## Юр" помдо' ядабта"

Салыңгардахана округна" тер" ненэцие" ила' саир" харрад – «ОЦНК» юр" поданда хаясь. Таҗок по" ямбан' нюмда, мэлвамда ханзели" яугамдамбавэдо'. Нюрте"э' «Домнацмена» нюбе"мы. Тикы' пуд «Дом туземца», «Дом ненца» ненэй ненэця' харадм' җэрм' тер" ила' саир" мяҗэ «Дом культуры народов Севера» нюмдевэдо'. 1990 похона округна" тер" ненэцие" ила' саир" харадм' нюбе"лавы.

Җоб" яля' җавхы" сеётэй", тарани" нюртей хардандо' хурка җэ"мям' манэ"лабтамбиць. Тикахана мэвы ненэй нем' ла-

ханакон ня"җадамзь. Пыда тарем' вадэ"җадась:

– Невхы похона тюкохона манзаравы" ненэцие" ила' нямна җэвы вададо' ихиня сава то"олха. Җока сеётэй", тарана" ненэця" тохолковы". ОЦНК тамна пон' таяя, савумданая. Тандая' хыноць тохолкода" пили" тоходаная".

Ныланава' аляхана ОЦНК' соя"ма' по' ед' концерт җась. Мяни тер" ня сырманзь товаць. Тарана", сеётэй" ненэця" нерна" няд җадиберҗаць. Тикахана лохо панҗась. Пуна' ембатавана" сер' җопой ненэй нем' ядабтадамзь. Няданда тарця" вади намдадамзь:

- Мань нюмами Ольга Ильична, еркарами Тайбери. Аксарка

хардахад товаць. Тэри таремҗав' выҗгана иледм'. Нянанни сеётани, тарани маниеб" җули" савась. Ембляродо' паскояць. Сёдо' тэри хайнаць. Теда' ОЦНК' юр" поданда хая, тикар җока. Тохолковани' мальнҗэхэд тенева. Падаркана тадтавы сидяңгахана манэ"пасетыв. Тамна җули" техэмда ехэрав. Җавна хасавамяңгами, Җаркамбо Николаевич Лаптандер, округна" ила' саир" мякана хынотаҗэ тарась. Пухуҗада «Сыра' Сэв»хана тарась. 1980-й похо"на Москва', тамна җани" марад' нямна ядэрцеты". Пыдаёльце сававна хыноцеты. Сёда тамна тенейн. Та' маляңгана җацекэдамзь, Салыңгардан' нисетыдм' тэвор". Белоярск хардахана школаха-

на тохолкудамзь. Хыно"мамда җацекы нини" ня телевизоркана манэ"цетыва". Вынд' мядо"манзь та' ханяҗэхэ"на тэворцеты. Теда' си"ми мара" ядабтананё", невхы иле"мини" тензебтедм'. Тюкохона манзарана" сенз" җэя". Тамна җани мэкад манэ"манда җамгэхэ"на, концертахана сидна" маябтамбая".

Ненэцие" ила' саир' хардахана манзарана" саць тарана серт' пон' хамекуць. Тикы' ед' җэда" ялэдо' сававна сертавыдо'. Мядондито' е"эмня таславыдо' малеяд". Тад пуна хуркари" концертадо' җани" аляха"на таяңгу".

**Руфина Окоэтто' пады**





# Таттаңкош тохотаңа”



Таттама: А. Пяк таттамы”

Чуки дилихина җашки” телевидениң дет җайта дядям мәшту”. Четаң, чуки ноптухуна электронные СМИ” шанат нешаң дилант тәвдят”. Җалтана” җашки” телевидениң мансдьян тохотамаң мәты нешади” дет тондота центрхана студия видеотворчества «Синема» тадя.



Җашки” дет җайта клубное формирование «Синема» манде ЦНКхана шеэв пуң манслаңа. Таңок пу” дямпан җука җашки” таттаңкош тохоңаш”. Чуки похона видеокружокхантоң дю” җашки” дятдыя”. Хамплянктоң – Җэдм’ чел” нешади” ню”. Нючаудитоң садикит мэна”. Четаң пытоң җадка” нетуң” маньдеш шаңкмян таньдет җайта шеду” манде каматайтун.

Шичитун тохолдмшота Вячеслав Николаевич Букацкий. Куптаң пыта ЦНКхана манслаңа. Кружокан дятдыш җашки” җука җамым шедташту”. Кукят камерам мәш таттаңкош тохоташту”, җыдит” видеорепортажу”, зарисовки”, видеоролику”, анимационный” мультфильму” шедтапё пытатуң конудпёшту”. Җашкеэ” таньше мэматоң нянантоң дельше вильҗа. Җамыдим тохоташ пяннантоң, ништу” кэлка. Таттамытуң хомана шедтамантуң мәты, компьютерхана мэта” шанат программы” тоходашту”. Талям пу”тахана кудкади” вильта” кинудю” шедташту”. Таттаңкумантуң камна кудкади” милас” шедтапёчитун мультфильметун мәты кошту”. Чикитоң компьютерный” программахана” мансапташтутуң, мунулапташтутуң. Синеман канта” җашкеэ” шедтапёчитун проектоң җука. Җамыдим пяннантоң җокна, җуп вив мәш мансдашту”.

Куки җашкиуди” манде хомана видео таттампёшь тохомай”. Шедтамайтун җамыдөтоң шанат конкурси” җайтапташтутуң. Тай”ня пу”тахана җайвахай местан камаштут. Видеон таттаңкута” җашки” маньшту: таньше мэма хомана вихинтуң камуля”. Хомана камеран тохомантуң мәты, мельмана таттаңкумантуң мәты кудкади” мероприятихи” кяшту”. Таньше мәш шанат вильта” репортаж”, видеоролик” татташту”. Студийханантоң җашки” кэлкамаң тайхана шаңкмян таньдет җайта мытоң практический” занятихинатуң тоходаштутуң. Талям четыдяң кружокан томы” җашкиуди” мед тохошту”. Җамы проект шедташатуң, кимядихина интервью пытыпёвштамтуң җокна таслаштутуң”. Куше микрофон’ хомана мәш тохотамам, камерахана таттаңкумам, чупей чикитоң маньдехедя тоходаштутуң. Талям таньняна видеостудихинтуң тоходкош

җашкяэ” ништу мадка”. Видеостудихина шедтапёчитун проектоң җукадөмутун нешади”, капиди” дилың, культураң нямна җа”. Шедтамайтун җамыдөтоң дельше хома”, вильҗа”. Шаңкмян җайвачетоң хома на вивинтолкадя, мельмана шедташтутуң.

Талям чики мансдетоң шанат международный’, все-российский’, региональный’ конкурсхана” хома паталт камаштут. Няймы куняхалт җыди” калтыхи” ништу” кай”, шедтамайтун видеороликатуң,

җай җыди” мансдетун интернетмана җайтапташтутуң. Таттаңкош тоходкота” җашки” маньшту”: кунялиң таньдет җайта видеоконкурси”, фестивалыхи” кяш-томыма җявма, тадөмшей хома җаймы җыдишь. Наңича” нена” куше мансламам манэстонҗама”, видеотаттампючи” шедтамы” кудкади” мастер-классхана мэштонҗама”.

Четаң ЦНКхана җайта видеостудихина тоходкоши җашкиуде” җокна мансдаш тохоташту”, шедтапёчитун җайвачетун дет кудкади” хома вив’ җуту” кошту”.

Андрей Пяк патмы

## Җобҗгэв’ падна

Җэрм’ тер” поңгана сабе җока падна-на ненэця’ җадиберта яңгу. Җадыбьята юнета няна” едэй книга җадимб”, җули” ихинана” сава җәсеты, сертавэхэта маймбасетыва”.

Анна Павловна Неркаги нюмам’ җакекы” мале школахана намдасетыдо’. Урокаха”нато’ я’ ханярина тенева на «Җанико Нохой» повестьмда толабасеты”. 1976 похона падвэхэнанда харта иланда нямна лахана. Таддикахад тохолкода” җакекы” хардахана хаюрмам’, марад’ илцейм’ саву”мам’, выңгы илам’ юрыбавам’ ваде”җа.

Тикы’ хавна «Белый ягель», «Молчаший», «Илир» книгыда таня”. Толаба пяб”, мал” хайна”. Мань «Илир» повестьмда толабавани мальҗгана җамгэхэртан’ лаво”лаңгаван’ нидамзъ харва”, тамбирувнанда нянани савась.

Анна Павловна’ падвы толавы” ненэця” җод” манзеты”, хэтыбада” вадида ёльце явнандо’ хан”җа”.

Едэй” җадиберта” книгыда җани’ җока”, тикэхэбида тедари’ җудаха”ни тэвувдавэй”. Тандая’ «Предание об одиноком человеке» нубетамда вадець пяць. Ма”нисям”, манзаядо’ мале җарханда хамэды, ялян’ җадимдеваридо’ хаи. Падтаңгодаңэ Полина Сайфуллина тара. Небой по’ «Җанико Нохой»’ падта”мад җобтикы пыда сергась. Тамальҗгана тамна җарка ненадумда”мам’ ня”мась.

Җокханда җопой ёнар” самляңг юр” пир” книгам’ җадимде тасламби”. Тюменской областной Дума няби Ямална” тодо” тэнз” ненэцие” толаңгулава’ нядаңгодҗаха”.

Анна Яптик’  
падвы

### ОБЪЯВЛЕНИЕ

**СЛУЖБА  
ПО КОНТРАКТУ  
В ВС РФ**

ПОЛНАЯ ИНФОРМАЦИЯ ПО ТЕЛЕФОНУ

**8(902)81-6-11-90**

ЗВОНОК ПО РОССИИ БЕСПЛАТНО

**ВРЕМЯ ДЛЯ  
ВАЖНЫХ РЕШЕНИЙ!**

**КОНТРАКТНАЯ СЛУЖБА**

**6 200 000 Р**

**ЕДИНОВРЕМЕННАЯ ВЫПЛАТА**

**3 500 000 Р**

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживания в г. Салехарде бесплатно, 3-х разовое бесплатное питание!

#### ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

**3 100 000 Р**

ЕДИНОВРЕМЕННО ОТ РЕГИОНА

ДО 120 000 Р

СЕРТИФИКАТ НА РЕАБИЛИТАЦИЮ

**400 000 Р**

МИНИСТЕРСТВО ОБОРОНЫ

ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

**ЕЖЕМЕСЯЧНЫЕ ВЫПЛАТЫ  
ПРИ НАХОЖДЕНИИ В ЗОНЕ СВО**

**РЯДОВОЙ  
ОТ 210 Т.Р**

**СЕРЖАНТ  
ОТ 232 Т.Р**

**ПРАПОРЩИК  
ОТ 292 Т.Р**



# Талереңгавы ненэця' ваде"мы

Илева' тяхад ненэй ненэця" хуркари" иле"ми вадецеты". Хальмераха", хэбидя ё" ерваха" талереңгами" нямна нэсеты". Тарця серо" нямна нэда" лахарё" сидя хани' син' сяни" ненэцяңгат намдвэми нэока. Тикыни" янамбовна падыбасетын, теда' мале нэрмани сер' харто' нэсондо' ихини ха"амсетыд". Намдормыни" - ненэцие" иле"ми" хавна тамна лаханакон", хальмер" ян' тэворон"ма", талереңгавы" ненэця" вадета".

Ненэй ненэця" лахарёхон"на техэ саирканда илма" няхар" нинар"мана миңа. Нэвана" ниня «Нум» хасава иле, сянди" явна ядэрта нэамгэм' таняд манне, илам' тасламби. Сямян илена" нэамгэ" я' сармик", икна илена нэамгэ", тиртя сармик", явна маирта", ненэця" нэдакы" «Нум» табедавы иландо' нэда нерня' миңа". Няби ня' ханта", яңгуворта" ненэця" я' мидхы лахарёхона я' ныл' ханңа", сидряңгадо' нэпой я' тир' ни' тэворн"а", талирнэ илена" ненэця" сэван' нэдиворн"а".

Яңгумы ненэця" я' нылна илена «Нэ» вэсаком' ерво"н"а", пыда таняна сямня серо-тасламби. Таняңы яханандо' нэоб' тарем' сидна" тотрев' иле". Нэдалёрн"а", мюсерн"а", хане". Пыдо' иле хаёвы" нидо' яңгумэңэ ваде"ядо'. «Нэ» вэсако хабцяңо я' тир' ни' нэдабтамби. Пыда пили" пон' нэворман' харва, тикы' е"эмня хуркари" хабця" нэдыбятон' я' тир' ни' нэдиворн"а". Невхы лахарёхона я' ныл' хэвы" ненэцие" сидряңг, талир нэдабтамби. Тикаңэ пим' ялэ"н"а", нэдыбятон' талирнэ хальмер" сидряңг" ненэцие" сэван' пи' нэдиберн"а".

Танянандо' иленаңэ сидна" хабэйңэ толаби". Сянхана тамна илена" нидо' сянзэ ярн"а", иле хаёвыдо' мерку нэандо', поңгато' тэвраван' харвэйдо'. Нэдыбятон' илева' тяхад ненэй ненэця" хальмерахатон' хэ"ли' вуни" ядэр", хальмер" хэван' хунахарт вуни" нэсонд". Невхы ва"алкана хальмер" нэцеки" пи' сянакурн"а", едейкурн"а", хуримна сюрамба ядэрн"а", илена" нэцекехэт нэдамдо' пюрн"а". Пэвсюмя' няна пон' еня" нэцеки манэ"патон' сянхана



маямбаңгу", сянаконда" нэцеки" сэвха" сидряңгадо' янамбовна нэдимда".

Хурина манзеты" – талерена ненэця' тэри нэамгэхэв тидрахам' манэ"сарн"а, муно намдорн"а, лаханакондараха" ненэцие" вабц намдорн"а. Талерон сэван' савовна манэ"мы" вадавна, хавы" ненэцие" сидряңг" тибей", нэдсуй" паны мэ"н"а", сядодо' тахабэй", медсуйраха".

Пихина сянаконва' яхана нэамгэхэв" сянакон манэ"патон' сянхана талир" маяңгун"ни"им", минхандон' мэ"лаңгудо', сянакон мяд' мюня тамна хонёда". Талеревы ненэця' янамбовна инда нэудм' ёта, тамна хансосяламзэ пиртада. Манзеты" – хальмер' сидряңг пили" пон' нэдаңгудо', тарць" нэсонгана ет' нэандон' сюртеңгудо'.

Мань нэцеки нэванималяңгана нэоб" иле"мям' намдадамзэ. Сянакон ня"мы няни Суңоси Яр' талере"мя. Нэрка ненэцяңэ хэ"мяхартахандонда талере"мамда юра я"мадась, пили" ибецетыда. Ваде"мыда серотон' сер' падынась. Хацявысь исялав", нэркавна хангула"махандонда нэвамда етри' едевись, сэвхата нэамгэхэби етри' манэ"сармысь. Нэвэданон нисяда хабей" тадебям', Пей Салиндерм' тэвравысь, тикар нэоб" яңорэй' самбдорон"махандонда савумдадась.

## СУҢУСИ ХАСАВА НЭЦЕКИ' ТАЛЕРЕ"МЯ

–Нявэй, таля"! Няна" ту", маня" нян' нули" харвава". Нэоб" яхана пили" пон' мэва". Ханяңэхэна сидряңгана" я' тир' нимня тэри ядэрн"а". Тарця иланд', яңганя ян' хабця' сидна" тэврась. Нэванана" нинан' таняңэ, иринана", хаданана" нэпой хомбсетыва". Нянанан' едэй ня това нули" сава нэңгу! Пин' нэдив"!

Тарем' лаханани Суңуси хасава нэцеки нэоб" пэвсюмя' няна намдорць пэвы. Пыда едэй ян' нэсон"махад нэоб" яля' понкая" мякдандон нэыхы явна ядэрмы. Хуркана пэвсюмы.

Раиса Япгунэ' падвы





## Вадава” тохоламбива”



Едэйкохо’, Саванехэ’ нобт’ тэвавэхэ’.  
Лахарёди’ ямб.

## Знакомство

## Торомдаҕова

Пойдём на горку!  
Где будем кататься?

Едейкованзэ хэхэни’!  
Ханяна едейкодани’?

На детской площадке.  
А где она находится?

Ҥацекеы” мэлвахана.  
Ханяна ҥа?

Около большой ёлки.

Ҥарка хады’  
хэвхана.

Ладно.

Ҥэё.

Пойдём быстрее.  
Здесь так красиво!

Мер’ хэхэни’!  
Тюкона нули” сава!

Все горки - ледяные.

Едейкулва” -  
мал” салаба”.  
Мань ҥарка  
едейкулван’ хаядм’.

Я пойду на большую  
горку.

А я буду играть в  
ледяной чаше.  
Поиграем в прятки?

Мань педраха мюня  
сянакуртадм’.  
Теда’ лынзекодани’?

Прячься!  
Ты меня не найдёшь!

Пыдар лыцгарад”!  
Си”ми нин хоңгу”!

Я тебя вижу!  
Ты меня нашёл?

Сит маниедм’!  
Мале си”ми хон’?

Теперь ты прячься.

Теда’ пыдар  
лыцгарад”!  
Нидм’ харва”, ҥани’  
едейкохони’.

Нет, не хочу, давай  
снова покатаемся.

Хорошо покатались!

Едейкова тарси”  
сава!

Да, хорошо провели  
день!

Ҥаха”, ялами  
сававна  
мэ”ҥами’!

Я замёрзла.  
Хватит играть.

Ханиямдм’.  
Сянако мась ҥэя.

Пойдём домой.  
Придёшь ко мне в  
гости?

Мякни’ хэхэни’!  
Хэхэни’, нянани  
тутан’?

Я подожду маму.  
До свидания.

Небями ҥатеңгудм’.  
Лакамбой’.

Лахарёди’ нердена пеля 5 номеркана ҥа.



Сидянт: tsnkpadum ияд ханавы”

## Хаерма” тю”уна хая

Нядаҥгардахана илена” нэрм’ тер”  
нобт’ тэвормы”. Нердена хаер’ яля’  
сэвм’ ядабтамбавы”. Тикаханандо’  
иринато’ ила’ саирм’ тензетембавы”.

Ҥацекеы”, небянадо’, нисянадо’, ха-  
данадо’, мал” «Дом природы» нубета  
мьд’ хэвхана ма”лэвы”. Сиддо’ сёётэй”  
не” мядолабтамбавы”. Пыдо’ – культура’  
харад’ манзарана”. Нядаҥгодидо’ «Ямал –  
нюна” я!» ассоциация’ тер” ҥэвы”. Нито’  
е”эмня мято’ мюйм’ ядемдавы”, ҥавьдота  
ҥаврадамдо’ пиревы”.

Харад’ тер” нидо’ манэць ёль-  
це маймбавы”. Ненэй мятрэв’ мярвы  
мядикондо’ хэвхана ҥацекеыдо’ няць  
сянаковы”. Пихина нумда нули” хэнё  
ҥэвы. Тецьдам’ нивэдо’ пилюс”. Паской  
ненэй паныдо’ сервы”. Ҥармы” нидо’ тэри  
илебьдэ ядэсумбавы”.

«Сырэй нум’ сидна” мэбеламби. Ха-  
няцей мэйрыва”. Хаер” сэв едэй иланд’  
сидна” тидхалембадараха. Лимбя’ иры-  
хына ялэна” ямбума”. Яберена яля’  
сэв ина” ҥу савумдамби. Ҥэвна” мюй”  
сибёворҥа”. Ҥарка пэвдя” пуд едэйвана  
юркотанарахава”. Сертаванда” манзаина”  
тасламбива”. Ныхына” ҥокамданараха”.  
Ҥацекеына” сянерта су”лякодарев’ сюр-  
берҥа”. Ихинандо’ таҥга”», – ванераб-  
тёрка ненадо яляндо’ нямна тарця вадимэ”  
мэ”мы”.

Хаҥоротаванзэ тэвравы” ҥаврадо’ –  
мал” нэрм’ яна” ҥавар”, пиревы ҥамза”,  
халы”, тэри ханюй ҥаябад”. Тодо” тэнз”  
ҥоди” поҥгана няръяна мараҥгаця сы-  
рэй хаертареv’ нярмортавы. Мят’ тьювы”  
мядонда” нули” саву”мэдо’.

Ҥармы” ненэцие” вадавна, ненехо-  
вавна вы’ тер” ил’ хаер’ сэвхад паҥгды.  
Ҥавнанда вымна мюсермы хасава иламда  
тарем’ тензетедасы: «Тев’ ёльцяҥгана яля’  
хаераком’ нёдалцетыва”. Ханенаҥэ мале  
ҥахакумна ҥэдалёрцетыва”. Еся яҥгуна”  
хубтаркахана мярыба пясетына”. Ме-  
рець манзарасетыва”. Маймбадарахадм’  
ҥэсетыдм’».

Сёётэй нидо’ нито’ е”эмня тодо тэнз”  
вадавна хыно”мы”. Мал ҥобкана тарця  
иҥудм’ нёдавы”: «Хаерако’ сей сидна” то-  
даламби. Пыда няринда маня” хыноҥава”!  
Небя’ ядёраха, сава вадараха!».

Антонина Салиндер хаераком’ хынаб-  
тамба мэта сёда тэри хайнавы. Паднана  
нядо’ Анагуричи Никита Александрович  
нобт’ ма”лэвы” нита е”эмня харта падвьда  
толабавы.

Ненэй ненэця”, хаби”, ҥысма”, ҥани  
гэнэм’ мэта” нерняҥы иламдо’ савумдам-  
ба, нись поёмба ҥобкана мэвы”. Хусувэдо’  
тенева: ҥолой ныхырим’ мэць тоенана  
серодо’ пирдалеҥгудо’. Тарем’ яна” сяр’  
нина хэд” иҥудм’ мэта” яҥгода”.

Галина Окотэтто’ падвы



Газета «Няръяна Нгэрм»	Главный редактор Яр Марина Тэтакучевна	ГЕНЕРАЛЬНЫЙ ДИРЕКТОР АНО «Ямал-Медиа» Зулинова Мария Андреевна	№ 6 Подписано в печать 06.02.2025г. Вышла в свет 08.02.2025 г. По графику: 16.00, фактически: 16.00.	ПОДПИСНЫЕ ИНДЕКСЫ: на год – ПА701, на полугодие – ПР562.
---------------------------	--	--	--	--

Учредитель – департамент внутренней политики ЯНАО  
(629008, ЯНАО, г. Салехард, пр-кт Молодёжи, д.9, каб.708).

Издатель – департамент внутренней политики ЯНАО (629008, ЯНАО,  
г. Салехард, пр-кт Молодёжи, д.9, каб.708)

Газета зарегистрирована – Управлением Федеральной службы по надзору в сфере  
связи, информационных технологий и массовых коммуникаций по Тюменской  
области, ХМАО-Югре и ЯНАО от 19 апреля 2012 года.  
Регистрационный ПИ № ТУ72 – 00559

Тираж 3600 экз.

Заказ № 0084 (тираж 3600 экз.) отпечатан в АНО «Ямал-Медиа»  
Юридический адрес: 629003, Ямало-Ненецкий автономный округ,  
г. Салехард, мкр. Богдана Кнунянца, д.1, каб. 106

Фактический адрес: 629007, Ямало-Ненецкий автономный округ,  
г. Салехард, ул. Чубынина, 39А

Газета выходит по субботам.

Цена годовой подписки 166 руб. 84 коп.

В розницу не распространяется.

Адрес редакции: 629003, ЯНАО,  
г. Салехард, мкр. Богдана Кнунянца,  
д.1, каб. 106  
тел. (349 22) 4-53-32

E-mail: nn@yamal-media.ru